

UPM tambah dua lagi pingat emas

Oleh Mohd Firdaus Hashim

firdaushashim@hmetro.com.my

Shah Alam: Universiti Putra Malaysia (UPM) menambah dua lagi pingat emas dan satu gangsa melalui acara lawan pedang pada temasya Sukan Institusi Pengajian Tinggi (SUKIPT) di Politeknik Sultan Salahuddin Abdul Aziz Shah, Shah Alam, semalam.

Husnul Ariq Bakri yang memperolehi pingat emas dalam kategori individu lelaki, mengalahkan atlet dari Universiti Teknologi Malaysia (UTM) Muhammad Rahmat Mohd Nor dengan mata 15-5.

“Perasaan saya smemangnya gembira kerana pasukan UPM menaruh harapan tinggi kepada saya, jadi lepas menang tadi saya berasa sedikit lega,” kata Husnul Bakri.

Bagi kategori individu wanita Foil, pingat emas dimenangi oleh Natasha Ezzra Abu Bakar dari UPM. Pingat perak pula milik Anis Syaqireen Jamarudin dari Universiti Teknologi Mara (UiTM) dan pingat gangsa milik Ivy Cheah Hsio Yong

dari UPM.

Sementara itu di Lapang Sasar Menembak Kebangsaan Subang, atlet lelaki UPM nyata mendominasi acara menembak apabila meraih dua pingat emas dalam acara 10m air pistol individu dan berpasukan, semalam.

Penembak elit kebangsaan, Jonathan Wong Guanjie dan Liew Tack Fai berjaya meraih pingat emas dan perak apabila masing-masing mencatat 195.4 mata dan 182.2 mata, manakala penembak pelapis negara, Jasmi Mohammad Zin mendaapat pingat gangsa dengan 165.4 mata.

Gandingan mantap Jonathan, Tack Fai dan Jasmi turut memastikan pingat emas buat UPM dalam acara berpasukan dengan mengutip 1,674 mata, menumpaskan trio dari Universiti Sultan Zainal Abidin (UniSZA) dan Universiti Teknologi Mara (UiTM).

Pasukan UniSZA merangkul pingat perak selepas mengutip 1,629 mata manakala UiTM menerima gangsa dengan catatan 1,586 mata.